

**Ufficio Stampa della Provincia autonoma di Trento**

Piazza Dante 15, 38122 Trento

Tel. 0461 494614 - Fax 0461 494615

uff.stampa@provincia.tn.it

**COMUNICATO n. 187 del 26/01/2022**

**Traduzione in ladino**

## **Sanità, la proponeta de n endrez nef portèda dant ai aministradores de Fiem, Fascia e Cembra**

**L endrez nef de l'Azienda provinzièla per i servijes sanitàeres l'é stat l'argoment tratà tel confront anter i rapresentanc istituzionèi de la Provincia autonoma de Trent, di Comuns, de la Comunità de Fiem e Cembra e del Comun general de Fascia, stat en vender da sera ai 21 de jené aló da la cèsa de comun de Pardac. "Col spartir noscia proponeta anter duc i teritories, volon tor su la osservacions de chi che se emprevel di servijes sanitàeres, estra che cheles di profescionis, de la organizacions sanitàeres e di sindacac – l'à sottrissà l'assessor provinzièl a la sanità Stefania Segnana -. Chesta Aministrazion provinzièla, dessema co l'Apss, la vel arvejinèr i servijes teritorièi e del ospedèl al sentadin, arsecurèr n azes per duc a la cures e, tel medemo temp, fèr a na moda che ogne post de lurier soscede enteres, gaissa e gust ti profescionis de la sanità". Do n prum passaje te Consei de la autonomies locales, la Jonta provinzièla l'à jà deliberà per chel che vèrda la spartijon di distrec sanitàeres: Nord, Sud e Est (te chest ultim l'é ite apontin Fiem, Fascia e Cembra, estra che Valsugana, Tesino e Primier).**

I detaes del nef endrez i é stac porté dant dal diretor generèl f.f. de l'Apss, Antonio Ferro, dal diretor del Servije de ospedèl provinzièl de Apss, Pier Paolo Benetollo, dal diretor f.f. per l'Integrazion sozio sanitàera de Apss, Gino Gobber, estra che dal sorastant generèl del Partiment sanità e politiches sozièles de la Provincia, Giancarlo Ruscitti.

Più avisa, l model nef de endrez aziendèl l vel renforzèr la ativitàes teritorièles col se meter dant cater obietives prinzipai: l tor a cèria i utenc, per ge arsecurèr n percors de cura più stabol e uman; na perferida di servijes sanitàeres valiva per duc sun dut l raion provinzièl; semplificazion e sparpagnament sul teritorie di prozesc dezijionèi, ence tras l potenziament e l'inovazion di servijes, tras la दौरa de neva technologies per favorir la comunicazion anter profescionis, estra che l svilup de l'informatisazion di sistemas de gestion e l sostegn di percorsc de enrescida e de formazion a do a do di operadores.

L argoment prinzipal, l'à sottrissà l diretor Ferro, l'é la valorisazion de la ativitàes sanitàeres sul teritorie e la azions de prevenzion e de promozion de la sanità. Per chesta rejon se se metarà dant de troèr aleanzas con dotores, dotores di bec e profescionis sanitàeres e sozio-sanitàeres, estra che con i raprejentanc di sentadins e la pèrts sozièles.

L commissarie de la Comunità de Fiem, Giovanni Zanon, l'à envià via dapò n debatit, a chel che à tout pèrt ence l procurador del Comun general de Fascia, Giuseppe Detomas e l ombolt de Giovo Vittorio Stonfer, che l raprejentèa la Val de Cembra tel Cal. I raprejentanc istituzionèi i à metù al luster l'emportanza che à i teritories te la definizion del nef endrez, soraldut per chel che vèrda a la capacità de soscedèr gaissa, gust e enteres ti sanitàeres, l'emportanza del ospedèl de Ciavaleis e de la "Casa della salute", col ge dèr luster e ge arsecurèr servijes de calità auta a duta la valèdes, tout ite cheles più dalonc dai zentres maores.

**Traduzion di Servijes Linguistics e Culturèi del Comun general de Fascia**

(Traduzione a cura dei Servizi Linguistici e culturali del Comun general de Fascia)

(cdt)